

官常典第五百九十九卷

臬司部彙考

唐

唐設觀察使掌所部善惡後改名巡察使又爲按察使按察採訪處置使雖隨時增改而職掌則一按唐書百官志觀察處置使掌察所部善惡舉大綱凡奏請皆屬於州

注

貞觀初遣大使十三人

巡省天下諸州水旱則遣使有巡察安撫存撫之名神龍二年以五品以上二十人爲十道巡察使按舉州縣再周而代景雲二年置都督二十四人察刺史以下善惡置司舉從事二人秩比侍御史揚益并荆四州爲大都督汴兗魏冀蒲綿秦洪潤越十州爲中都督皆正三品齊鄆涇襄安潭遂通梁夔十州爲下都督從三品當時以爲權重難制罷之唯四大都督府如故置十道按察使道各一人開元二年曰十道按察採訪處置使至四年罷十七年復置十道京都兩畿按察使二十年曰採訪處置使分十五道天寶末又兼黜陟使乾元元年改曰觀察處置使

遼

遼設按察諸道刑獄使 按遼史百官志按察諸道刑獄使開泰五年遣劉涇等分路按察刑獄採訪使太宗會同三年命于骨鄰爲採訪使 按續文獻通考遼南面有按察諸道刑獄使有分決諸道刑獄使官不常設有詔則選才望官充之

宋

太宗淳化二年五月庚子置諸路提點刑獄官 按宋史太宗本紀云云 按職官志提點刑獄公事掌察所部之獄訟而平其曲直所至審問囚徒詳覆案牘凡禁繫淹延而不決盜竊逋竄而不獲皆劾以聞及舉刺官吏之事

淳化四年冬十月壬戌罷諸路提點刑獄司 按宋史太宗本紀云云

眞宗景德四年七月癸巳復置諸路提點刑獄 按宋史眞宗本紀云云

大中祥符二年詔提點刑獄官不舉察官吏者坐 按宋史眞宗本紀大中祥符二年十一月甲子詔諸路官吏蠹政害民轉運使提點刑獄官不舉察者坐之

大中祥符七年十二月丁巳詔川陝閩廣轉運提點刑獄官察屬吏貪墨慘刻者 按宋史眞宗本

紀云云

仁宗天聖四年二月甲寅詔吏犯贓至流按察官失舉者并劾之三月甲申詔轉運使提點刑獄
按宋史仁宗本紀云云

天聖六年春正月戊午罷提點刑獄 按宋史仁宗本紀云云

天聖八年八月癸丑復置諸路提點刑獄官 按宋史仁宗本紀云云

明道二年十二月丙申復置提點刑獄 按宋史仁宗本紀云云

景祐元年七月辛丑詔文武提刑毋得互相薦論 按宋史仁宗本紀云云

景祐二年八月己卯置提點刑獄鑄錢官 按宋史仁宗本紀云云

慶曆二年春正月癸亥詔磨勘院考提點刑獄功罪爲三等以待黜陟 按宋史仁宗本紀云云

慶曆三年冬十月戊申詔二府同選諸路提刑 按宋史仁宗本紀云云

慶曆七年五月戊寅詔武臣非歷知州軍無過者毋授同提點刑獄 按宋史仁宗本紀云云

慶曆八年六月乙未詔館閣官須親民一任方許入省府及轉運提點刑獄差遣 按宋史仁宗本

紀云云

皇祐元年六月戊子詔轉運使提點刑獄所部官吏受贓失覺察者降黜 按宋史仁宗本紀云云

至和元年三月壬申置京畿提點刑獄 按宋史仁宗本紀云云

嘉祐二年秋七月辛卯命孫抃張昇磨勘提點刑獄課績 按宋史仁宗本紀云云

嘉祐四年六月癸酉詔諸路提點刑獄各舉本部官有行實政事者三人以備陞擢 按宋史仁宗

本紀云云

嘉祐五年八月乙酉罷諸路同提點刑獄使臣 按宋史仁宗本紀云云

神宗熙寧 年罷武臣提點刑獄 按宋史神宗本紀不載 按職官志提點刑獄公事舊制參用

武臣熙寧初神宗以武臣不足以察所部人材罷之

熙寧二年十一月丙子罷諸路提刑 按宋史神宗本紀云云

熙寧六年三月戊辰置刑獄檢法官 按宋史神宗本紀云云 按職官志熙寧六年置諸路提刑

司檢法官

哲宗元祐元年三月癸酉置開封府界提點刑獄一員 按宋史哲宗本紀云云

紹聖 年以提刑兼坑冶事 按宋史哲宗本紀不載 按職官志云云

元符二年四月庚辰令廣西提點刑獄司兼領鹽事 按宋史哲宗本紀云云

徽宗崇寧四年春正月丙申詔京畿路改置轉運使提點刑獄官 按宋史徽宗本紀云云

崇寧五年十一月辛亥并京畿提刑入轉運司 按宋史徽宗本紀云云

宣和 年以盜賊未衰增置武提刑一員 按宋史徽宗本紀不載 按職官志宣和初詔江西廣

東增置武提刑一員然遇闕帥不許武憲兼攝中興以盜賊未衰諸路無武臣提刑處權添置一員

高宗紹興元年十二月己卯詔兩浙分東西路置提點刑獄 按宋史高宗本紀云云 按職官志

紹興初兩浙路以封疆闊遠差提刑二員淮南東路罷提刑令提舉茶鹽官監領蓋因事之煩簡而

損益焉

紹興二年七月甲戌罷淮東路提點刑獄司 按宋史高宗本紀云云

孝宗乾道六年置諸路武臣提刑 按宋史孝宗本紀云云 按職官志詔諸路分置武臣提刑一

員須選差公廉曉習法令民事之人如無聽闕其後稍橫遂不復除

乾道八年用臣僚言諸路經總制錢并委提點刑獄官督責 按宋史孝宗本紀不載 按職官志云云

淳熙九年夏四月乙卯詔諸路提刑文武通置一員 按宋史孝宗本紀云云

寧宗嘉泰二年三月己未初命諸路提刑以五月按部理囚 按宋史寧宗本紀云云

嘉泰四年秋七月己巳命諸路提刑從宜斷疑獄戊子命諸路提刑提舉司措置保伍法 按宋史寧宗本紀云云

開禧元年秋七月壬午詔諸路提刑提舉司措置保甲 按宋史寧宗本紀云云

開禧三年命諸路提刑司從宜斷刑獄 按宋史寧宗本紀云云

嘉定十五年以臣僚言就鬱林州與靜江府兩處置司 按宋史寧宗本紀不載 按職官志嘉定十五年臣僚言廣西所部州軍最多提刑合照元降指揮分上下半年就鬱林州與靜江府兩處置司無使僻地貧民有冤莫吐從之其屬有檢法官幹辦官

嘉定十七年八月理宗卽位冬十月戊戌詔諸路提點刑獄以十一月按理囚徒 按宋史理宗本紀云云

金

金諸路設提刑司改爲按察使設提刑使或兼宣撫安撫勸農轉運等使 按金史百官志按察司本提刑司承安三年以上京東京等提刑司并爲一提刑使兼宣撫使勸農採訪事爲官稱副使判官以兼宣撫副使判官爲名復改宣撫爲安撫各設安撫判官一員提刑一員通四員安撫司掌鎮撫人民譏察邊防軍旅審錄重刑事安撫判官則銜內不帶勸農採訪事令專管千戶謀克安撫使副內差一員於咸平一員於上京分司承安四年罷咸平分司使在上京副在東京各設簽事一員承安四年改按察司貞祐三年罷止委監察採訪使一員正三品掌審察刑獄照刷案牘糾察濫官汙吏豪猾之人私鹽酒麪並應禁之事兼勸農桑與副使簽事更出巡按副使正四品兼勸農事簽按察司事正五品承安四年設判官二員從六品大定二十九年設明昌元年以陝西地闊添一員知事正八品承安三年上京者兼經歷安撫司使泰和八年十一月省議以轉運司權輕州縣不畏

不能規措錢穀遂詔中都轉運依舊專管錢穀事自餘諸路按察使並兼轉運使副使兼同知按察並兼轉運副添按察判官一員爲從六品中都西京路按察司官止兼西京路轉運司事遼東路惟上京按察安撫使及簽事依舊署本司事遼東轉運使兼按察副使同知轉運使兼簽按察司事轉運副使兼按察判官添知事一員知法二員從八品 書史四人書吏十人抄事一人公使四
十人

右中都西京並依此置陝西上京兩路設簽按察司事二員上京簽安撫司事上京東京等路按察司并安撫司使正三品鎮撫人民議察邊防軍旅之事仍專管猛安謀克教習武藝及令本土純愿風俗不致改易副使二員正四品簽安撫司事正五品簽按察司事正五品知事兼安撫司事正八品知法四員從八品 書史四人上京東京書吏十八人女直十二人漢人六人中都西京女直五人漢人五人北京臨潢女直三人漢人五人南京女直二人漢人七人山東女直三人漢人七人
大名女直三人漢人六人抄事一人公使十人

右按察使於上京副使於東京各路設簽事一員分司勾當惟安撫司不帶勸農字內知事於上京

自餘並於兩處分減存設

世宗大定二十九年正月章宗卽位六月初置提刑司又令提刑官於便殿聽旨又以提刑司舉劾諭臺臣按金史章宗本紀大定二十九年春正月章宗卽位六月乙未初置提刑司分按九路並兼勸農採訪事丁巳命提刑官除後於便殿聽旨每月使副內一員入見議事如止一員則令判官入見其判官所掌煩劇可升同隨朝職任十二月壬子諭臺臣曰提刑司所舉劾多小過行則失大體不行則恐有所沮其以此意諭之

章宗明昌二年十一月壬申勅提刑司官自今每十五日一朝按金史章宗本紀云云

明昌三年宰臣請罷提刑司不許命議察監司任職之法按金史章宗本紀明昌三年六月癸卯宰臣請罷提刑司上曰諸路提刑官止三十餘員猶患不得其人州郡三百餘處其能盡得人乎弗許丁巳定提刑司條制九月庚午謂宰臣曰隨路提刑司舊止察老病不任職及不堪親民者如得其實卽改除他路若他路提刑司覆察得實勿復注親民之職卿等其議行之

承安三年并上京兩路提刑司按金史章宗本紀承安三年春正月丁巳并上京兩路提刑司爲

一提刑使副兼安撫使

承安四年罷諸路提點刑獄置按察司

按金史章宗本紀承安四年三月乙卯司空襄右丞匡參

知政事揆請罷諸路提點刑獄從之夏四月改提刑司爲按察使司

宣宗貞祐二年二月丙辰罷按察司

按金史宣宗本紀云云

元

世祖至元六年立四道提刑按察司

按元史世祖本紀至元六年春正月癸丑立四道按察司二

月壬午以立四道提刑按察司詔諭諸道

至元十一年夏四月辛亥分陝西隴右諸州置提刑按察司治鞏昌

按元史世祖本紀云云

至元十二年秋七月己卯增置燕南河北道提刑按察司

按元史世祖本紀云云

至元十四年春正月癸卯復立諸道提刑按察司五月癸卯各道提刑按察司兼勸農事七月丙午

置八道提刑按察司

按元史世祖本紀云云

至元十五年增設提刑按察使司

按元史世祖本紀至元十五年秋七月甲申江南湖北道嶺南

廣西道福建廣東道並增設提刑按察使司八月己卯復立按察使司於畏吾兒分地

至元十六年二月乙巳命西蜀四川道立提刑按察司五月丙辰按察司添副使僉事各一員按元史世祖本紀云云

至元十八年五月戊申罷霍州畏兀按察司按元史世祖本紀云云

至元十九年二月乙巳立廣東按察司秋七月庚申命行御史臺揀汰各道按察司官按元史世祖本紀云云

至元二十年正月改廣東廣西福建鞏昌按察司爲道省北京副使僉事官增設各道判官按元史世祖本紀至元二十年正月壬午改廣東提刑按察司爲海北廣東道廣西按察司爲廣西海北道福建按察司爲福建閩海道鞏昌按察司爲河西隴北道五月丙子省北京提刑按察司副使僉事各一員十月庚戌各道提刑按察司增設判官二員

至元二十二年正月改按察司爲提刑轉運司二月復立按察司按元史世祖本紀至元二十二年春二月辛酉改按察司爲提刑轉運司己巳復立按察司詔各道提刑按察司能遵奉條畫蒞事

有成者任滿陞職贓污不稱任者罷黜除名

至元二十三年詔按察司參用南人又徙江東浙西二司罷諸道判官 按元史世祖本紀至元二

十三年三月己巳御史臺臣言近奉旨按察司參用南人非臣等所知宜令侍御史行御史臺等程文海與行臺官博采公潔知名之士具以名聞帝命賫詔以往五月甲戌徙江東按察司於宣州冬十月甲午徙浙西按察司治杭州罷諸道提刑按察司判官

至元二十四年以三道按察隸御史臺分置提刑按察司官又按道分治 按元史世祖本紀至元

二十四年春正月辛卯以淮京淮西山南三道按察司隸行御史臺閏二月乙丑省隴右河西道提刑按察司分置鞏昌者入甘州設官五員以鞏昌改隸京兆提刑按察司設官六員省太原提刑按察司分置西京者入太原五月庚子以燕南按察司治大名南京按察司治南陽太原按察司治西京

至元二十五年二月省遼東江南提刑按察司入北京京南 按元史世祖本紀至元二十五年二月壬戌省遼東海西道提刑按察司入北京江南湖北道提刑按察司入京南

至元二十六年徙廣州按察司尋立雲南按察司又徙瀾東河東山西按察司各分所治 按元史世祖本紀至元二十六年春正月戊申徙廣州按察司於韶州以荆南按察司所統遼遠割三路入淮西二路入江西六月辛巳復立雲南提刑按察司八月甲戌徙瀾東道提刑按察司治婺州河東山西道提刑按察司治太原

至元二十七年三月庚申增提刑按察司僉事二員十一月甲子徙河北河南道提刑按察司治許州 按元史世祖本紀云云

至元二十八年改提刑按察司爲肅政廉訪司 按元史世祖本紀至元二十八年二月丙戌詔改提刑按察司爲肅政廉訪司每道仍設官八員除二使留司以總制一道餘六人分臨所部如民事錢穀官吏奸弊一切委之俟歲終省臺遣官考其功效

至元三十年十一月丁巳立海北海南道肅政廉訪司 按元史世祖本紀云云

成宗大德二年十一月丙申罷雲南行御史臺置肅政廉訪司 按元史成宗本紀云云

大德三年冬十月甲寅復立海北海南道肅政廉訪司 按元史成宗本紀云云

大德六年以中書省臣言許廉訪司依舊體察 按元史成宗本紀大德六年春正月乙卯中書省臣言御史臺廉訪司體察體覆前後不同初立臺時止從體察後立按察司事無大小一皆體覆由是憲司之事積不能行請自今除水旱災傷體覆餘依舊例體察爲宜從之

大德九年五月戊午改各道肅政廉訪司爲詳刑觀察使十月辛丑復以詳刑觀察司爲廉訪司

按元史成宗本紀云云

仁宗延祐二年六月乙未徙陝西肅政廉訪司於鳳翔 按元史仁宗本紀云云

明

明設提刑按察司并所屬官 按明會典各提刑按察司正官按察使一員副使 舊各二員後添

設兵備海道等項副使員數不一今福建二員貴州四員廣西五員廣東浙江江西河南各六員

四川七員湖廣雲南各八員山西十員山東十三員陝西十六員

僉事 員數不一今廣西貴州各二員江西陝西雲南各三員浙江廣東各四員福建河南山東山

西各五員湖廣四川各六員 以上副使僉事臨時照資叙互用無定衡

提學官每省各一員或副使或僉事無定銜

首領官經歷知事照磨檢校各一員 內檢校浙江廣東山東貴州俱革

所屬衙門司獄一員

皇清

國朝外官

大清會典在外直省各官惟山西陝西甘肅按察使康熙七年定爲滿缺其餘俱係漢軍漢人補授
直隸爲畿輔地不置藩臬設大名巡道兼河南按察司銜通永天津巡道俱兼山東按察司銜
霸昌井陘巡道俱兼山西按察司銜

各提刑按察使司

正官 按察使 江南湖廣陝西各二員餘省各一員 副使 各省員數因事添革不

一今陝西九員廣東五員江西湖廣福建四川各三員江南浙江河南雲南各二員山東廣西

各一員餘省無 僉事 各省員數因事添革不一今江南山東各二員浙江湖廣福建陝

西四川廣西貴州各一員餘省無 提學道 每省各一員或副使或僉事無定銜

首領官 經歷一員 知事一員江西福建山西廣東廣西各一員他省無

照磨所 照磨一員 檢校一員江西福建山西陝西各一員他省無

所屬衙門 司獄司 司獄江南湖廣各二員浙江江西山東河南陝西廣東廣西雲南

貴州各一員他省無

西寧道所屬倉 大使一員舊設五員後裁四員 舊有肅州靖遠兩道所屬倉大使各

一員後裁 舊有倉副使草場大使後俱裁

西寧道所屬各驛 驛丞六員舊設七員康熙六年裁一員

寧夏道所屬各驛 驛丞三員

臬司部名臣列傳

唐 薛季昶

按唐書本傳季昶絳州龍門人武后時上書自布衣擢監察御史以累左遷平遙尉復拜御史屢按